



UKA 2018/60/234  
13. november 2018  
Aqqaluk Heilmann

Immikkoortut 60, 234 ataqatigiisillugit suliarineqassapput

**Piniakkat killilersukkat avanersuarimi Ittoqqortoormiinilu killilersorneqarunnaarnissaat anguniarlugu apeqquaqat aallaavigalugu oqallisissiaq.**

(Inatsisartuni ilaasorta q Jens Napâtôk', Partii Naleraq)

**Piniakkat killilersukkat Tasilami nunaqarfiinilu killilersorneqarunnaarnissaat anguniarlugu apeqquaqat aallaavigalugu oqallisissiaq saqqummiuppara.**

(Inatsisartunut ilaasorta q Jens Napaattoq, Partii Naleraq)

Siullermik qujavugut oqallisissiatatut saqqummiisumut. Siunnersuutaasut marluk sumiiffinnut assigiinnigitsunut tunngassuteqartunut imatut Atassummiit oqaaseqassaagut:

Nunarujussuatta siammasissumik inoqarneranut tunngaviupput inuussutissat imaani nunamilu piniakkat pissaqarfialugit inuussutaasimasut. Taanna assortugassaangilaq. Uagullu maaniittugut peqataassaagut, pitsaanerpaamik, naapertuunnerpaamillu piniarnermik aalisarnermillu inuussuteqarnek illersortuassallugu, ullumikkut, siunissamilu ungasinnermi.

Piujuaannartitsinissaq siunnerfigalugu piniakkanik killilersuinerup pitsaanerpaaffianut inissisimajuarnissaa tamatsinnut pingaarutilerujussuvoq.

Takornartaangilaq biolog-it piniartullu nunatsinni piniakkat amerlassusaannik naliliisarnerisa nikingasarnerat. Pisassiissutinillu aalajangiisarnermi nalorniuartarnek uggornarpoq. Uungalu inissittariaqartarluta, kikkut upperiومانerugut? Ilinniagartuut, ilisimatusarnikkullu uumasorsiuut? Immaqaluunniit kalaallit piniartut ullut tamaasa piniakkat pinngortitarsuullu akornaniittut? Tassunga apeqquammut killittarnek uggornartuuvoq.

Kialluunniit nunamini atuisuusup ilisimaarivai qaaquussaralugit isigisani misigisanilu, soorlu uumasut piniakkani, taakkulu sumiiffimmini amerlassuserisagaat isaannarmik isigisanit, qaammatillu qanoq ilinerini nalliusimaartarneri ilanngullugit naluneq ajorpaat.

Uumasorsiuut ilisimatusarnikkullu misissueqqissaarlutik uumasut amerlassusaannik uuttortaajuartut aamma apeqquasiinnagassaangillat. Upperinatigit killittuassagutta sooq pinngortitaleriffeqarpugut? Soorlu uumasorsiuunik sulisitsivugut?



Silaannaap allannguuteqalaarneranik sikusartumi inuusugut malugisimavarput sikuniartanera sikuusarneralu allannguuteqarnikuusoq. Taamaammatt pisariaqarlunnarpoq ilisimatuussutikkut paasisat, inuillu piniarnermik inuussuteqartut ataqatigiissakkamik tutsuiginartumillu Naalakkersuisunut anngunneqartassasut. Sumiiffinnullu assigiinngitsunut naapertuuttunik.

Atassummiit piujuaannartitsinissaq pingaartipparput. Kinguaatta neqissaqartuarnissaat pingaartillugu. Taamaammatt una oqallinneq pingaaruteqarlunnarpoq siunissami pisasseeriaasissatta tunngavissaa qulakkiissagutsigu.

Siunnersuuteqartup sumiiffinni eqqaasamini piniagassat imaaginnavissut eqqartorpai, piniartullu pinngortitarsuarlu tassanilu piniagassat ilisimasaqarfiginerpaajugaat tunngavilersuutigalugit. Tunngavilersuuterpassuupput paasinarluinnartut.

Isiginngitsuusaarusunngilarpullu sumiiffinni isorliunerusuni tikikkuminaannerpaanilu piniarnermik aalisarnermillu inuussutissarsiorfiusuni, nioqqtissanillu tikittoqarpiarneq ajortuni. Naapertuunnerusumik pisassiisoqarsinnaanersoq paaserusussinnaavarput.

Uani oqallinnermi piniartut uumasorsiuullu akerleriisinneqarlutik eqqartorneqarnatik, aaqqiissutaasinnaasunik ujarlerta, siunnersuuteqarluta alloriarfissaasinnaasunik.

Periarfissaalluarsinnaappummi assersuutigalugit, piniarnermut aalisarnermullu siunnersuisooqatigiit, susasaqartunik tamanik peqataaffigineqartoq. Aamma sukumiinerusumik uumasorsiuut naliliisinnaaqqullugit, suli amerlanerusunik aningaasaliiffigineqarsinnaapput. Immaqalu sumiiffiit uani taakkartorneqartuni annertusisamik misissueqqissaarneq ingerlanneqarsinnaalluni. Pingaarluinnarporlu piniartut peqatigalugit misissuinissaq.

Atassummiit, qularinngilarpullu partiinit tamanit, inuiaasugullu kalaallit tamavitta isumaqatigiissutigisinnaasarput tassaasoq: Piniartut neqissaqartariaqarput, kalaallit neqissaqartariaqarpugut, qulakkeerluinnassavarpullu siunissami taamatut aamma inissisimajuarnissarput.

Naggasiutigalugulu apeqqutigerusuppara tamassinnut. Pisasseeriaaseq apeqquserneqartuartartillugu suna pitsaanerpaava? Amerlanaarlugit pisassiisoorneq, immaqaluunniit ikinaarlugit pisassiisoorneq?

Ujartussavarpulli naapertuuttumik pisassiisoqarnissaa.